

Nuuk, 14/11 2022

Uunga: APN

Att.: Rebekka Jensen

Sustainable Fisheries Greenland (SFG) pissuseqatigiiaanut sinerissap qanittuani aalisarneqartartunut aalisagartassat 2023-mi annertunerpaaffissaat, TAC, pillugit tusarniaassummut matumuuna akissuteqarpoq.

Saarulliit

Tamakkiisumik isigalugu uumassusilerinermi siunnersuutit naapertorlugit pisassiisoqassasoq SFG-mit isumaqarpugut. Tamanna siunissaq ungasinnerusoq eqqarsaatigalugu aalaakkaasumik aalisarnissamik annertunerpaamillu aningaasarsiornissamik qulakkeerinninnissamut periusaavoq, taamaalillunilu aalisarneq MSC-tut akuerisaallunilu akuersissut pigiinnarneqarsinnaassaaq.

Sinerissap qanittuani saarullinnik aalisarpallaarneq marlussunnik ajortunik kinguneqaratarsinnaavoq. Pissuseqatigiiaat amerlanerpaartaat Kalaallit Nunaata kitaata sineriaaneersuummata aalisarfiit ilaanni aalisarpallaartoqarpat aalisarneq pissuseqatigiiaanut taakkunungattaq ajoqutaasinnaallunilu pissuseqatigiiaat amerliartornissaraluat ajornakusuulersinnaavoq. Avataani aalisarneq pillugu ICES-imiit siunnersuut tassaavoq *"aalisartoqassanngilaq"*.

Aqutsineq maanna atuuttoq 2023-milu aalisarneqarsinnaasut annertunerpaaffissaatut siunnersuut naapertorlugit saarullinniarneq MSC-tut akuerineqarsinnaanngilaq. Tamanna siunissarlun gasinnerusoq eqqarsaatigalugu nungusaataanngitsumik aalisarnissaq ukiut ikitsuinnaat ingerlanerini anguneqassappat aalisarneqarsinnaasut annertunerpaaffissaannik aalajangiiniarneq ammanerusumik ingerlanneqartariaqartoq SFG-mit isumaqarpugut. Tamanna 2023-mi periusissatut pilersaarusiornermi eqqartorneqassasoq, ICES-imiillu siunnersuinemik, 2023-mi nalilersuineq pilersaarutaasoq naammassippat saqqummiunneqartussamik tunngaveqassasoq SFG-mit siunnersuutigineqarpoq.

Aqutsinissamut pilersaarummik atuutsitsilernissap tungaanut agguaanissaq ataani allaqqasooq naapertorlugu uumassusilerinikkut siunnersuummut nalimmassariartuaartoqassasoq SFG-mit siunnersuutigineqarpoq:

2023: $1.5 \cdot \text{Pinngortitaleriffimmiit siunnersuineq} = \text{ca. } 14\,000 \text{ t}$

2024: $1.3 \cdot \text{Pinngortitaleriffimmiit siunnersuineq} = x \text{ t}$

2025: $1.1 \cdot \text{Pinngortitaleriffimmiit siunnersuineq} = x \text{ t}$

2026: $1.0 \cdot \text{Pinngortitaleriffimmiit siunnersuineq} = x \text{ t}$

Taamaaliornikkut nuukkiartuaartoqarsinnaavoq, 2023-milu aalisagartassiissutissatut siunnersuut 2022-mi aalisarneqartut annertussusaannut, pissuseqatigiiaat maannamut nammassinnaarpassitaannut, naapertuutikannissaaq. Pissuseqatigiiaat amerliartortut Sisimiuni Nuummilu misissuinerit takutikkaat, taamaammallu piffissami sivisuumi aalisarpallaartoqarsimagaluartoq pisarineqartartut ikiliartorneri 2023-mi unissasut tunngavissaqartumik neriutigineqartoq SFG-mit ilanngullugu maluginiarneqarpoq.

Qalerallit NAFO 1B – 1F (aalisarfik 46)

Ineriartornerup maanna atuuttup mumisinnissaa siunissarlu ungasinnerusoq eqqarsaatigalugu MSC-tut akuersissuteqarnissaq anguniarlugu SFG qalerallit sinerissap qanittuani aalisarneqartut pillugit ilungersorluni suliaqarpoq. Pingaarnertut aalisarfik 47 pineqarpoq, aammali aalisarfik 46, taamaammallu aalisarfimmi 46-mi 47-milu aqutsineq MSC-mi piumasaqaatinut piaartumik naapertuutilissasoq SFG-mit neriutigineqarpoq. Taamaammat aalisarfimmi 46-mi pisassiisarneq uumassusilerinikkut siunnersuinnermut nalimmassariartuaarneqassasoq SFG-mit kissaatigineqarpoq. Nuummili aalisagartassiissutissatut siunnersuummi 2023-mut atuuttumi maluginiagaaq tassaavoq uumassusilerinnermi siunnersuut 34%-imik sipporneqarmat. Taamatuttaarlu Nuup eqqaani aalisarnerup ineriartornera ernumanartoqarpoq. Aalisarneq pillugu paasissutissat immikkoortiterivitsigut katersorneqartut takutippaat 1/1 2022-miit 31/7 2022-mut aalisakkat agguaqatigiissillugu takissusaat 48,9 cm-iusoq taakkunanilu annertuut (11%) minnerpaaffissamiit 42 cm-iusumiit naannerusut. Tamanna ukiuni kingullerni aalisangaatsiarnerup kinguneraa, MSC-llu malittarisaannut naapertuutinnginnerata saniatigut siunissaq ungasinnerusoq eqqarsaatigalugu nungusaataanngitsumik aalisarnissamut aamma naapertuutinngilaq. Assersuutigalugu piffissap ilaani ukiumut >1000 t ataallugu aalisartoqartarnerata kingorna 1990-imiit 2010-mut ukiuni 20-ni Nuummi aalisartoqangaarnikuunngilaq. Taamaammat Nuummi aalisagartassiissutit uumassusilerinnermi siunnersuinnermut naapertuutissasut SFG-mit innersuutigineqarpoq.

Aqutsivimmi Paamiuni+Qaqortumi aalisarneqartartut takissusaat qanoq innersut SFG-mit ilisimaneqanngilaq, aalisarneqarsinnaasulli annertunerpaaffissaat siunnersuinnermit 89%-imik qaffasinnerussanngitsoq SFG isumaqarpoq. Tamatumunnga taarsiullugu siunnersuinnermut nalimmassarnissaq siuartinneqartariaqarlunilu aalisagartassiissutit siunissami qaffanneqarnaveersaartariaqarput.

Kalaallit Nunaata kangiani sinerissap qanittuani aalisagartassiinissaq SFG-mit akuerineqarpoq. Tamanut ammasuullunilu kingusinnerusukkat MSC-tut akuerisaasinnaavoq. Tamanna peqqutigalugu Qaanaami aalisagartassiisoqarnissaa SFG-mit isumaqatigineqarpoq. Kukkuneqalaarporli. Tusarniaassummi 250 t allaqqavoq, nalunaarsuiffimmi 252 t allaqqasoq.

Qeqertarsuup Tunuani, Uummannami Upernavimmili qalerallit (Aalisarfik 47)

Aalisagartassiissutit annertunerpaaffissaat siunnersuineramik malinnittariaqartut SFG tunngaviusumik isumaqarpoq. Aalisarfimmili 47-mi qalerallit pillugit paasissutissat pigineqareersut tamarmik siunnersuinerami najoqqutarineqanngimmata nangaassuteqarlutalu NAFO-miit siunnersuineq aalisagartassiissutit annertunerpaaffissalerneqarnerannut tunngavigineqassanngitsoq SFG-mit isumaqarpugut. Taamaammat siunnersuineramik nutaamik qajannaannerusumillu pilersitsinissaq pimoorussilluni sulissutigineqassasoq tungaanullu aalisagartassiissutit annertunerpaaffilernissaannut periusissaq SFG-p siornatigut siunnersuutigisimasaa najoqqutarineqassasoq SFG-mit siunnersuutigineqarpoq. Tamanna tusarniaassutit siuliinut akissuteqarnitsinni saqqummiunnikuuarput, sinerissap qanittuani qaleralinniarnermik aqutsinissamut pilersaarummut ilassummi aamma aalisarnermik pitsanngorsaarnermik suliniuteqarnermut (FIP) innersuutini. Tassa imaappoq aalisarneqartuni agguaqatigiissillugu takissutsit aalisarneqarsinnaasut annertunerpaaffissalerneqarnissaannut tunngaviusariaqarlutillu siornatigut saqqummiunneqareersutut ukiumut aalisarneqartut agguaqatigiissillugu 57 cm-iusarnissaat anguniarneqartariaqartoq SFG-mit innersuutigineqarpoq.

Taamaammat aalisarfinni aalajangersimasuni 2023-mi aalisarneqarsinnaasut annertunerpaaffissaatut SFG ima siunnersuuteqarpoq:

Qeqertarsuup Tunua:

- Ilulissani immikkoortiterivinnit paasissutissat naapertorlugit 2020-mi 2021-milu aalisarneqartut agguaqatigiissillugu takissusaat 51,94 cm-iullutillu 50,37 cm-iupput. Tassa imaappoq ukiuni taakkunani marlunni agguaqatigiissillugu takissuseq 51,16 cm-iuvoq.
- Ukiut taakku marluk nikingassusaat 57 cm-inillu anguniagaqarneq tassaapput: $51,16\text{ cm} / 57\text{ cm} = 0,90$.
- 2021-mi aalisarneqartut tunngavigalugit 2023-mi aalisarneqarsinnaasut annertunerpaaffissaat ima naatsorsorneqarpoq:
 - o $TAC_{2023} = Aalisarneqartut_{2021} * nikingassut = 9031\text{ t} * 0,90 = 8129\text{ ton}$.

Uummannaq:

- Qeqertarsuup Tunuani naatsorsuinermit periuseq malillugu Uummannaq pillugu ima naatsorsuisoqarpoq:
- $2020 + 2021$ agguaqatigiissillugu: $(58,57\text{ cm} + 56,76\text{ cm}) / 2 = 57,67\text{ cm}$
- Nikingassut: $57,67\text{ cm} / 57\text{ cm} = 1,01$
- $TAC_{2023} = 9610\text{ t} * 1,01 = 9706\text{ ton}$

Upernavik

- Qeqertarsuup Tunuani naatsorsuinermit periuseq malillugu Uummannaq pillugu ima naatsorsuisoqarpoq:
- $2020 + 2021$ agguaqatigiissillugu: $(56,28\text{ cm} + 54,99\text{ cm}) / 2 = 55,64\text{ cm}$
- Nikingassut: $55,64\text{ cm} / 57\text{ cm} = 0,98$

- $TAC_{2023} = 8481 \text{ t} * 0,98 = 8311 \text{ ton}$

Qalerallit alliaortorsinnaanerinik sapinngisamik annertunerpaamik atorluaanissamut arlaannaanulluunniit attuumassuteqanngitsumit naatsorsuineq malillugu 57 cm anguniarneqartoq SFG-mit naqissuseqqinneqarpoq. Aggvaqatigiissillugu takissuseq 57cm-iuppat tamanna aalisartunut, ingerlatseqatigiiffinnut Namminersorlutillu Oqartussanut akileraartarnikkut iluaqutaassaaq. 57 cm aalisakkerinermik suliaqartunit aklerlineqartarpoq, tunuliaqutaanilli kiisalu aaqqeeriaasermik paasinninnissaq amigaataasoq SFG-mit isumaqarpugut.

Nipisat

Pinngortitaleriffik siunnersuinermini kingullermi aalajangeeriaaseq aqutsinissamut pilersaarummi kingullermi akuerineqartoq atorniarnagu aalajangerpoq. Periuseq aalajangerneqartoq malillugu siunnersuigaanni qaffasippallaalissammat uumasooqatigiit aalisarneq nammassinnaaneraat nalornissutigineqartoq Pinngortitaleriffimmit tunngavilersuutigineqarpoq. Taamaammat 2022-mi pisassiissutigineqartut annertoqataannik siunnersuineq attanneqarpoq. Pisassiissutit annertussusaat SFG-mit isumaqataaffigineqarpoq, periuuserli isumaqatigineqanngilaq.

MSC naapertorlugu aqutsinerup aqutsinissamut pilersaarut naapertorlugu ingerlanneqarnissaa pingaarteqarpoq. Siunnersuinermini mianersorluni periuseqarneq tunngaviummat ukioq manna ajornartorsiuteqarnavianngitsoq SFG-mit isumaqarpugut. Tamannali siunissaq ungasinnerusoq eqqarsaatigalugu aaqqiissutaanngilaq, aalajangeeriaasermullu uteqqiinnartoqarsinnaanngimmat siunissami MSC-tut akuersissuteqalernissamut ajoqutaasinnaavoq. Tamanna pillugu takisuummik, maana ilanngunneqassanngitsumik, nassuiaateqarpoq, SFG-li pisariaqassappat nassuiaasinnaavoq.

Taamaammat 2023-mi aalisarneqarsinnaasut annertunerpaaffissaat periuseq atuutereersoq malillugu allannguuteqalaarlunili aalajangerneqassasoq SFG-mit siunnersuutigineqarpoq. Qaffakkiartornera tulaanneqarsinnaasutut siunnersuutigineqartunik (LPUE) amerlisarnagu aalisarneqartut kingulliit (2022) malillugit amerlisarneqarsinnaavoq. Aalisarneqartartut LPUE-mut sunniuteqarnerat piviusoq naapertorlugu aalisarneqarsinnaasut annertunerpaaffissaat aalajangerneqassammata iluaqutaassaaq, aalisarneqartullu allat annertussusaat malillugu sunniunnissaanik eqqoriaasoqassanngilaq. Periuseq taanna aamma ajoquteqarpoq, taakkuli iluaqutissaniit annikinnerupput. Aqutsinissamut pilersaarummi aalajangeeriaatsimik annikitsumik allannguinnissaq taamaallaat pisariaqarpoq, aalajangeeriaatsip ilaani oqaaseq "advice" "catch"-imik taarserneqaannarsinnaavoq.

Periuseq taanna atorlugu 2023-mi aalisarneqarsinnaasut annertunerpaaffissaat ukuussapput: $1223 \text{ t} * 1,20 = 1468 \text{ t}$.

Taamaalilluni iluaqutissat marluk anguneqarsinnaapput: aqutsinissamut pilersaarut malinneqassaaq, aalisarneqarsinnaasullu annertunerpaaffissaat Pinngortitaleriffiup siunnersuutissaanut naapertuutikannertussaassapput. Periuseq taanna maannamiit siunissami aamma atorineqartariaqarpoq. Siunnersuerialaaseq pilersinneqarmat pisassiissutigineqartut

tamarmik pisarineqartassasut naatsorsuutigineqarsimanera "ajornartorsiummut" peqqutaavoq.
Piffissami tassani pissutsit ullumikkut atuuttut siumungaaq takuneqarsinnaasimanngillat,
taamaammallu periuseq allanngortittariaqarpoq.

Kissavaasat

Qanoq aalisartoqartiginersaq paasissutissaatigineqanngimmat paasissutissanik
katersueqqaarnissaq iluaqutaassaaq.

SFG aalisarneqarsinnaasut annertunerpaaffissaannut ilassutissaqanngilaq. Aalisaatigineqartulli
immap naqqanut ajoqutaasinnaammata aalisarneq aalisarfinni atuutereersuni ingerlanneqassasq
SFG kajumissaarivoq.

Inuulluaqqusilluta

Sustainable Fisheries Greenland